

15. maj 2017

**Ilinniagaqartut 16-it 25-illu akornanni ukiullit kalaallisut oqaaseqartut, meeqqat atuarfiannit anillutik ilinniakkamik ingerlatsisinnaanerit anguniarlugu, ilinniarfiit sorliit annertuumik aningaasartuuteqarfiunngitsumik isersinnaanermut piunasaqaataasa ilinniartitsissutillu ilinniartunut kalaallisut oqaasilinnut nalimmassarneqarnissamut piukkunnaateqarnerannik misissuinermit UPA2018-imi saqqummiunneqartussamik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut.**

(Inatsisartunut ilaasortaq Mimi Karlsen, Inuit Ataqatigiit)

Siumut sinnerlugu Mimi Karlsen, Inuit Ataqatigiit qutsavigalugu aalajangiiffigisassatut siunnersuutaanut imatut oqaaseqarfigissavarput.

Naalakkersuisooqatigiit anguniakkaminni ilannguppaat inuusuttut amerlanerusut meeqqat atuarfiiniit soraarummeereernermit kingorna ilinniagaqaqqittarnissaat naalakkersuisooqatigiit qulakkeer-niaraat. Taamaattumik tamassuma qanoq isikkulimmik aqqissuunneqarnissaanut suleqataanissat-sinnut qilanaarluta ilusilersueqataajumaarpugut.

Siumup anguniakkamini ilanngullugu pingaartippaa inuusuttut amerlanerusut meeqqat atuarfiiniit soraarummeernermit kingorna ilinniagaqaqqittarnissaat qulakkeerumallugu.

Siunnersuuteqartup misissuisimanerani takusinnaavagut 16-25 akornanni ukiullit 38%-ii 2014-mi meeqqat atuarfiata naammassereerneranni ingerlariaqqinngittoortartut. Tamanna kisitsit annertuvoq, naak akerlianik tulluusimaarnaraluartoq ilinniartut ilinniakkamikkut qaffasissusaat pitsanngoriartortut isikkoqarmat, illua tungaani inuusuttorpasuit qallunaatut oqaatsit aporfiullutik ilinniarfinnut ingerlariaqqinngitsoortarnerat uggornartuuvoq.

Ila inuusuttut qassiillimi piunassuseqarlutik angorusutaminnillu takorluugaqaraluarlutik oqaatsinik aporfeqarlutik taqisinneqaannartarsimanerpat? Qassiillimi ilinniagaqarnissamik aallusserusukkalarlutik allamiut oqaasiinik aporfeqarlutik uniinnarsimanerpat ingerlariaqqinngitsoorlutillu? Aali nammineq nunatsinniilluta inuusuttagut siunissattut taasagut, tamanna allannortittariaqarparput. Inuusuttut piunassusillit, anguniagallit sulerusuttullu nammineq oqaatsigut atorlugit ilinniaqqik-kusuttut siuarsaaqataaffiginissaat aqutissiuuttariaqarpagut. Maannakkut ingerlareersut saniatigut allatigut taakkununga iluaqutaasumik periarfissarsiiuuttariaqarpagut.

Inuiaat innuttakittunnguuvugut nunarsuarmioqatigut allanut sanilliulluta assersuukkuminaattuuvu-gut, anersaakkulli siuaasatta ileqquinik suli pigisaqarnerput tulluusimaarutigiinnarnagu nukittorsar-tuartaqarpagut aamma oqaatsitigut.



Taamaattumik pissusissamisoorpoq kalaallisuinnaq oqaasillit tapersorsorlugit meeqqat atuarianniit anigaangata aqutissanik inuunermi ingerlariaqqinnissamik isumallualersitsisinnaasunik neqeroorfigisinnaassallugit, misigilertillugit aamma taakku nunatta atorfissaqartikkai, uagullu aamma taakku pisariaqartikkigut.

Maani inersuarmitugut nunattalu inuisa amerlanerussuteqartut anguniagaat pillugu nunarput imminut oqaatitsigullu siuariartortoq tamatigut nukittorsartuartaqarparput, nalikinnerusutut suunginnerusutullu misigisut annikinnerpaaffimminniinnissaat anguniarlugu una siunnersuut tapersernissaanut pissutissaqarluarpugut.

Taamaatut oqarluta ataatsimiititaliamut susassaqartumut ingerlanneqarnissaa innersuupparput. Ataatsimiititaliallu sulilluarnissaanik kissaapparput.

Laura Táunâjik

Siumut